

太原縣志目錄

卷之一

星野 有圖

沿革 疆域附有圖

卷之二

城垣 村堡附有圖

山川 有圖

水利 橋堰附

學校 書院附有圖

卷之三

公署 坊表附有圖

田賦 戶口附

風俗

物產

祀典 寺觀附

卷之四

古蹟 陵墓附

帝王 皇后封爵附

卷之五

名宦

卷之六

職官

卷之七

寓賢

卷之八

選舉一

卷之九

選舉二

誥封

恩蔭附

卷之十

人物

名臣
孝義

仕蹟
隱逸

儒林
藝術

文苑
仙釋

卷之十一

列女

卷之十二

藝文一

卷之十三

藝文二

卷之十四

藝文三

卷之十五

祥異

卷之十六

遺事

卷之十七

渠案

卷之十八

雜誌

太原縣志卷之十


人物

事賦論云古今人不相及豈篤論哉士貴自立至晉唐之間陽多偉人宋元以來似爲少替然近世如王恭襄之

政事閭潛邱之文學擬之古人何多謬焉今綜其事跡而稍爲類次曰名臣曰仕蹟曰儒林曰文苑曰孝義曰隱逸曰藝術曰仙釋無美不備於以見是邑之多才也志人物

漢

常惠少貧自奮應募隨蘇武北使并見拘留十餘年乃還



由光祿大夫歷官至右將軍典屬國嘗使匈奴烏孫龜
茲等國有功卒謚壯武

晉

王湛字處沖渾弟初有隱德人莫能知兄弟宗族皆以爲
癡其父和獨異焉兄子濟嘗詣湛見牀頭有周易問曰
叔父何用此爲湛曰體中不佳時脫復看耳濟請言之
湛因剖析元理微妙有奇趣濟歎曰家有名士三十年
不知濟之罪也還白其父曰濟始得一叔乃濟以上人
也武帝亦以湛爲癡每見濟輒謂之曰卿家癡叔死未
濟曰臣叔殊不癡臣惡其美帝曰誰比濟曰山濤以下

魏舒以上湛少爲秦王文學歷任汝南內史卒年四十
七子承

王承湛子昶之孫弱冠知名爲東海太守政尙清靜及渡
江爲中興名臣昶至承世有令名論者謂祖不及孫孫
不及父

王述字懷祖少孤事母以孝聞性沉靜年三十尙未知名
人或謂之癡司徒王導以門地辟爲中兵屬導每發言
一坐莫不贊美述正色曰人非堯舜何得每事盡善導
改容謝之出補臨海太守遷建威將軍會稽內史涖政
清肅終日無事子坦之爲桓溫長史溫欲爲子求婚述

嚴拒之太和三年卒追贈侍中驃騎將軍開府諡曰簡
子坦之嗣

王坦之字文度弱冠有重名徵拜侍中襲父爵領左衛將
軍本州大中正坦之有風格深非時俗放蕩不敦儒教
著廢莊論簡文帝臨崩詔大司馬溫依周公居攝故事
坦之自持詔入於帝前毀之帝曰天下儻來之運卿何
所嫌坦之曰天下宣元之天下陛下何得專之乃改詔
焉溫卒坦之與謝安共輔幼主年四十六卒臨終與謝
安相沖書言不及私惟憂國家事朝野甚痛惜之追贈
安北將軍諡曰獻

唐

白居易字樂天其先太原人徙下邳敏悟絕人未冠受知於顧況貞元中擢進士拔萃歷翰林學士右拾遺遇旱奏免江淮兩賦以救流瘠且多出宮人納之吐突承璀率師出討王承宗居易言承璀爲制將四方聞之必輕朝廷後世且傳中人爲制自陛下始陛下忍受此名哉不聽尋被讒遷江州司馬穆宗時除杭州刺史築堤捍錢塘湖鍾洩其水灌田千頃復浚李泌六井民賴之晚以刑部尙書致仕自號香山居士卒年七十五贈尙書右僕射諡曰文

王起性孝友讀書經目弗忘與兄播並舉賢良方正遷中書舍人數有諫書以戶部尙書判度支奏營田以省饋挽歷河中節度使蝗旱善於設法毋致民饑調山東道興水利民無凶年累擢同平章事四典貢舉所拔皆知名士

明

王鑑字彥昭景泰甲戌進士授御史嘗於左順門面斥中官非禮中官怒甚屬都御史蕭維楨因考察去之維楨不從天順時彗星見鑑與同官十三人將劾石亨曹吉祥給事中王竑洩於亨亨先與吉祥泣訴上言鑑等結

黨排陷明日疏入收疏首張鵬楊瑄悉召諸御史擲彈
章俾自讀訖下獄榜掠遣戍會風雷雹災甚乃止貶膚
施知縣有善政憲宗初所司以治行聞擢延安知府陝
西守臣亦上鑑膚施政績特賜敕褒之

王瓊字德華成化二十年進士授工部主事出治漕河三
年著爲志繼者按之不爽毫髮正德十四年宸濠反舉
朝惴惴瓊談笑自如人訝之瓊曰諸君勿憂吾用王伯
安贛州正爲今日不過旦夕賊成擒耳未幾而捷疏至
人咸稱服嘉靖七年督陝西三邊軍務撫降七十餘族
土魯番率十國奉貢諸番蕩平十年冬召入爲吏部尙

書十一年秋卒贈太師諡恭襄瓊在本兵功甚多而其督三邊也人以比楊一清云所著有晉溪集三邊奏議行於世

以上名臣

漢

王柔字叔優王澤字季道俱爲郭林宗所許曰二人皆二千石才也雖然叔優當以仕宦顯季道宜以經術進若違才易務亦不至也叔優等從其言叔優至北中郎將季道代郡太守

三國

令狐邵爲宏農太守所在清潔時郡不知經學乃問諸吏
有欲遠行就師者遣令詣河東樂詳受學由是宏農學
業轉興

許允晉陽人魏侍中少與崔贊齊名子二皆有令聞

王昶字文舒代郡太守澤之子也仕魏謂魏承秦漢之弊
法制苛碎宜釐正國典以準先王之風著治論畧依古
制而合於時務者二十餘篇又著兵書十餘篇言奇正
之用青龍中奏之歷官至大將軍司空都督屢立戰功
甘露四年卒追諡曰穆侯子渾嗣

晉

王渾字元沖和子沉雅有器量襲爵京陵侯晉初遷徐州刺史歲飢開倉賑贍百姓賴之以平吳功進秩司徒元康七年卒謚曰元長子尙早亡次子濟嗣

王濟字武子少有逸才風姿英爽氣蓋一時善易及老莊文詞秀茂與姊夫和嶠裴楷齊名累遷侍中齊王攸當之藩濟諫請忤旨左遷又坐鞭王官吏免官武帝謂和嶠曰我將罵濟而後官之如何嶠曰濟俊爽恐不可屈帝因召濟切讓之旣而曰知愧否濟曰尺布斗粟之謠常爲陛下愧之他人能令親者疏臣不能使親者親以此愧於陛下帝默然尋使白衣領太僕年四十六先渾

卒追贈驃騎將軍

王忱字元達坦之第四子弱冠知名爲人通朗誕放自驃騎長史歷官驃騎都督將軍出爲荊州刺史威風肅然殊得物和桓元時在江陵每裁抑之元憚服數年卒官追贈右將軍謚曰穆

王嶠字開山柔之後也永嘉末避亂渡江元帝鎮建業厚待之王敦請爲參軍時敦在石頭欲禁民伐蔡州荻嶠力持不可敦將殺周顗戴若思嶠立止之敦大怒欲斬嶠賴謝鯤以免敦平後除中書侍郎轉遷吏部郎御史中丞秘書監領本州大中正求補廬陵郡尋以疾卒

王訥字文開嶠弟訥始過江仕至新淦令周顓稱之曰王
訥形貌既偉雅懷有概保而用之可作諸許物也子濛
王濛字仲祖少時放縱不羈後乃克已勵行有風流美譽
居家孝友善隸書美姿容自司徒掾歷官長山令簡文
輔政益貴幸之號爲入室之賓轉司徒左長史年三十
九卒

王蘊字叔仁濛子起家佐著作郎累遷佐書吏部郎性平
和不抑寒素補吳興太守甚有德政屬郡荒飢開倉賑
卹主簿執陳請待報蘊曰將死之命能待報乎專擅之
愆罪在太守遂大賑貸賴蘊全者十七八以違科免士